



# Lingua de Nam♥rar

**Secretaría Xeral de Política Lingüística**  
**Dirección Xeral de Xuventude, Participación e**  
**Voluntariado**  
**2021**

XUNTA DE GALICIA

## LINGUA DE NAMORAR

Xa está aquí o mes de #Namorar e, aínda que o mundo está confinado e vivimos circunstancias excepcionais que nos impiden ou dificultan bicar, abrazar ou aloumiñar como desexariamos, a palabra, a ilusión e a tecnoloxía seguen sendo as nosas grandes aliadas para desconfinar a voz e expresar os sentimentos de #Amor neste tempo de #NamorarEnPandemia.

As consellerías de Cultura, Educación e Universidade e de Política Social, a través da Secretaría Xeral de Política Lingüística e da Dirección Xeral de Xuventude, Participación e Voluntariado, respectivamente, convocan #LinguaDeNamorar, un concurso en liña de mensaxes de amor en galego dirixido á mocidade.

### Obxectivos

Dinamizar o uso da lingua galega entre as mozas e mozos nas súas relacións persoais e nas tecnoloxías da información e da comunicación, nomeadamente, na Internet e na mensaxería instantánea.

Incrementar a percepción do galego como unha lingua que é útil para os momentos de lecer e de diversión.

### Características das mensaxes

As mensaxes de amor deberán estar escritas en lingua galega e poderanse redactar en prosa ou en verso. A extensión máxima da mensaxe será de 350 caracteres, no caso das categorías A e B, e de 200 caracteres, no caso da categoría C, incluídos os espazos en branco en ambos os dous casos.

Cada participante poderá enviar un máximo de dúas mensaxes ao concurso.

### Criterios de valoración

Teranse en conta o grao de elaboración da mensaxe, a orixinalidade e a calidade da lingua. Todas as mensaxes deberán ser inéditas.

A organización do concurso desbotará aquelas mensaxes de carácter discriminatorio ou ofensivo.

### Persoas destinatarias e categorías

Lingua de namorar é un concurso dirixido a toda a mocidade con idades comprendidas entre os 14 e os 35 anos.

Establécense tres categorías de idade:

- Categoría A: de 14 a 19 anos
- Categoría B: de 20 a 35 anos
- Categoría C: de 14 a 35 anos

### Premios

Establécense tres premios por cada unha das categorías de idade A e B:

- 1º Bicicleta eléctrica BK1000 Youin ebike Amsterdam
- 2º Tableta ZA4G0023SE Lenovo tablet 10,1" 2/32GB
- 3º Cámara WILD4 3GO cámara deportiva 4k

Establécese un único premio pola categoría de idade C:

- 1º Bicicleta eléctrica BK1000 Youin ebike Amsterdam

## Procedemento de participación

### No caso das categorías A e B:

Para poder enviar as mensaxes cumprirá rexistrarse na páxina do concurso:

<http://xuventude.xunta.es/linguadenamorar> para o que se deberá cubrir un formulario de inscrición.

Todas as mensaxes serán publicadas na páxina do concurso e estarán identificadas polo título e mais polo número que se lles asigne. As mensaxes gañadoras serán as únicas que se identifiquen co nome e apelidos das autoras e autores.

### No caso da categoría C (exclusiva para a rede social IG):

Cómpre ser seguidor/a de @xuventudegalicia e de @linguagalega.

As mensaxes publicaranse directamente na imaxe habilitada para o concurso #LinguaDeNamorar no perfil @xuventudegalicia. No texto indicárase en primeiro lugar un cancelo que recolla o título e despois a mensaxe. Ao final da publicación, engadíranse os seguintes cancelos e etiquetaxes: #LinguaDeNamorar #NamorarEnPandemia @linguagalega. Etiquetaranse tamén dúas amizades de IG.

## Prazo de presentación

A data límite para enviar as mensaxes é o 12 de marzo.

## Votación

### No caso das categorías A e B:

O período de votación abarcará do 15 ao 23 de marzo. As persoas que queiran votar tamén deberán rexistrar na páxina do concurso. Cada usuario/a poderá votar por un máximo de tres mensaxes en cada unha das categorías de idade.

O xurado do concurso elixirá as declaracións gañadoras de entre as 50 mensaxes máis votadas polos usuarios e usuarias en cada unha das modalidades e categorías de idade.

### No caso da categoría C:

A mensaxe gañadora seleccionárase en dúas fases:

1. O xurado do concurso fará unha preselección de 6 mensaxes de entre todas as presentadas en prazo que respecten o indicado nestas bases.

2. O 31 de marzo daranse a coñecer as 6 mensaxes preseleccionadas polo xurado, que concorrerán á votación final do público dende o 1 ao 8 de abril. Rematado o prazo de votación computaranse os gústame que reciba cada mensaxe e gañará aquela que acade un maior número de gústame por parte do público. No caso de que exista empate entre dúas ou máis mensaxes prevalecerán no cómputo o número de gústame dados por parte de seguidores/as de @xuventudegalicia e @linguagalega. A organización reserva o dereito de establecer calquera outro procedemento de desempate.

## **Xurado**

O xurado do concurso estará conformado por un representante da Secretaría Xeral de Política Lingüística, un representante da Dirección Xeral de Xuventude, Participación e Voluntariado, un representante da Rede de Dinamización Lingüística, un representante da Rede Galega de Información Xuvenil e unha escritora ou escritor recoñecido en lingua galega, ademais de Ciro Fernández e de Adrián Gómez, gañadores do 1º Premio Xuventude Crea 2020 de Poesía e Novel Curta, respectivamente.

## **Resolución**

A listaxe cos nomes das persoas gañadoras e finalistas nas tres categorías publicarase o 12 de abril. Tanto as mensaxes gañadoras como finalistas daranse a coñecer publicamente en <http://xuventude.xunta.es/linguadenamorar> e nos IG @XuventudeGalicia e @LinguaGalega. No caso da categoría C, a persoa autora da mensaxe gañadora poñerase en contacto coa organización antes do 15 de abril para reclamar o premio e facilitar os datos de contacto.

## **Entrega de premios**

No mes de abril terá lugar a entrega de premios.

## **Aceptación das bases**

A participación neste concurso implica a plena aceptación destas bases. A organización resérvase o dereito de modificar e interpretar as bases deste concurso sempre e cando sexa necesario para o seu bo desenvolvemento e atendendo especialmente á situación sanitaria.